



Rabu, 30 Oktober 2024
Ogen: Lukas 15:11-14



"Mulih Ku Keluarga"



Sekalok perbapan nuri-nuri bas sada seminar lansia, nina "Aku 11 anakku, kerina ia sukses. Pendahinna ras perjabunna kerina sikap. Tapi enggo bagenda tuangku, bukku pe enggo mentar kerina, arah 11 anakku ndai la lit sada pe si ndarami aku, si nelepon pe la lit. Melungen kal kuakap. Nai aku sibuk tiap wari erbintuas, berkat langa terang, banci erminggu-minggu luar kota, mulih la erturin, sung ciger sanga anak e kerina sekolah, sung berngi kenca ia nggo tunduh. Gundari erkadiola aku." Bage nina nuri-nuri janah naktak iluhna. Arah enda si idah maka kai si suan e nge si turah. Sibuk erdahin perbapan ndai erbahanca anak-anakna la ndatken nanamna kekelengen sekalok bapa seakatan arah pemerena sen. Emaka kenca mbelin anak-anak ndai akapna bias sen saja kirimken guna perpan ras pertambar bapana. Ngobahkenca si e enggo mesera sabap enggo dekah bage jadi bas perukurena. Tapi arah ogenta si idah anak si mindo erta man bapana si nggeluh denga, lawes tapi asum mulihken atena, tetap nge ialo-alo Bapa. Kekelengen Bapa ras pengalemiNa em gegeh situhutuhu. Dibata e kap bapanta. IA tetap siap ngalo-ngalo kita amin uga gia ndauhna kita nggo sirang bas Dibata nari. Pernah nge si gejab maka kita lanai layak guna reh ndahi Tuhan ban dosa-dosanta? Perumpaman e ngajari kita maka Tuhan lalap sikap ngalo-ngalo kita. Bagepe keluarganta, uga pa pe ndauhna kita enggo sirang ras ia. Entah uga gia belinna pernah persoalenta ras, keluarga tetap jadi sada rumah guna inganta mulih. Erlajar arah bapa si lansia ndai, uga pe sibukna ras dauhna kita mulihlah tungkir perdiatken jabu. Sen ras kebayaken la ngasup ngantiken keriahen pulung ras keluarga.